

celebrandis, quod sibi vult Anonymus; certissimum, inquam, est, ejusmodi bacchantes, tanquam male feriatos, ex templo excommunicandos fuisse. Quia autem posterius non est factum; ergo nec prius. Ejusmodi autem ritus subinde eosdem adhibuisse, qui per se liciti & adiaphori fuerant, credibile est. Sed tamen omnia non esse excusanda, fateor. Porro objici solet, *Maximum Taurinensem Homil. de Circumcisione Christi* aliquos reprehendisse, qui larvati cum Ethnicis pervagati fuerint. Regero, quamvis unus & alter id fecerint, cæteris tamen omnibus id non esse imputandum. Semper enim carcinomata in Ecclesia fuerunt. Legatur tota Homilia. Si quis porro objiciat, *Salvianum* (*vergente Seculo V. Lib VI. de Gubernat. Dei*) Christianis exprobrasse, quod ludis scenicis Ethnicorum adfuissent p. 119. item cap. VIII. p. m. 164. *Illud, ait, perniciosius ac scelestius, quod multi eorum, qui professionem Christum dicaverant, mente idolis serviebant. Quis enim non eorum, qui Christiani appellabantur, Cælestem illam, aut non post Christum adoravit, aut quod est pejus, multo ante, quam Christum?* Sed nulli bi de celebratione Bacchi hic agitur; & si Episcopi, propter inspectionem ludorum tam scenicorum, quam Circensium, & propter venerationem *Uranie* illos reprehenderunt; quid, quæso, dixissent, si Christiani ante jejunium quadragesimale Baccho aliquod Festum dicassent atque celebrassent?

§. XI.

Pergo ad *octavam* rationem a detestatione Bacchanalium desumptam. Cur enim Christiani tunc festum hoc Bacchi Ethnicum & proprie sic dictum una cum omnibus ritibus Thyrsigerorum celebrassent, cum tamen maxima detestatione & horrore id prosequerentur, & idololatriam Ethnicorum exagitarent, uti ex supra citatis Patribus videre est? Præprimis notatu digna sunt, quæ *Socrates* narrat, de binis Apollinariis, Patre ac filio. Hi hymnum saltem Epiphaniæ Sophistæ in laudem Bacchi audiverant; quapropter Theodotus Laodicensis Episcopus illos excommunicavit. *Hist. Eccles. Lib. VI. c. 25. p. m. 672.*

VIII.
A detestatione Bacchanalium.

§. XII.